

**Mbete kí dɔsɔy kí  
Piyər  
ndàngi**

**Ta-je kí dɔ mbete-ti kí dɔsɔy  
kí Piyər ndàngi**

Njèkɔwkulə Piyər ndàngi mbete kin adi njèkadmeɛ-je kí 'sane-na dɔnangi-ti læ dow-je kí Rɔm, dɔnangi Aji-ti kí ngon-é (kí bone bè 'fa-é Turki). Ɛ ndigi kulə dingəm meɛ-dé-ti dan kò-je-ti kí d'isi d'ingə ngá kin rəm, bá ndigi kadi-dé tógi kɔ kò-je kí d'ow kì kingə kì kingə bɔy kin rəm.

Piyər lé, to dow káre dan dow-je-ti kí boy kí ri-é tò meɛ mbete-je-ti læ Matiye, kì Marki, kì Luki, kì Ja, rəm tò meɛ Mbete kullə-ti læ Njèkɔwkulə-je kí kù lo kɔr-é-je-ti 1-10 rəm tɔ. 'Gə-é kì ri-é kí Simɔ. Jeju mbəti-é adi-é to kí káre dan njéndó né-je-ti liə kí dɔgi gidi-é joo, ə ində ri-é læ Piyər (Mark 3:16-17). Go-ti, loki Jeju təl ɔw dɔrɔ-ti gogi lé, Piyər ingə tógi ilə-né mbɛ Poyta kí Maji kí sobi dɔ kaji dan jipi-je-ti rəm, dan jipi al-je-ti rəm. Lo kɔr-é-ti kí 5:13 lé, Piyər tɔji kí n'ndàngi mbete kinlé dɔnangi Babilɔn-ti kí d'un d'ɔji-né bebo Rɔm.

Kɔ ta-je kí boy-boy ra mutə meɛ mbete-ti kin adi to ta kí sobi dɔ: Kaji rəm, kulə dɔ gin tógi-ti rəm, bá kò rəm. Kulə gin-é-ti lé, Piyər ra oiyo Lubə kɔ kaji kí tò kì takul Jeju Kristi ə ole-né meɛ njèkadmeɛ-je kí dɛ lé Lubə oji-dé koji kí

sigi, kɔɔ nékində mɛɛ dɔ-ti kí tò kəm. E ulə dingəm mɛɛ-dé-ti kadi panjiyə-dé aa njay, kɔɔ kadi kaji kinlé tɔji-né rɔ-é ndaa-ti rəsi. Tò kadi dɛ d'a tɔji kullə ra-dé kí maji kɔ kəm rəbi kulə dɔ gin tógi-ti adi dɛ lay ya kadi d'ulə dɔ-dé gin tógi-ti lə njékɔbe-je; kadi bə-je d'ulə dɔ-dé gin tógi-ti lə 'ba-dé-je; kadi dené-je d'ulə dɔ-dé gin tógi-ti ngow-dé-je ə kadi dingəm-je d'un ta ne-dé-je. Kí sobi dɔ kɔ rəmə, njékadmɛɛ-je lé, lé dow-je d'ulə kəm-dé ndoo titi kí ndəki d'ulə-né kəm Jeju ndoo kin bə kàrè, kadi d'adi to rɔ-dé al. To kəm rəbi kí tò kɔɔ kadi d'ingə-né kɔ kɔ ta liə.

### *Tɔji rɔ kɔ lapiya kí ra*

<sup>1</sup> Mə Piyər, njəkowkulə lə Jeju Kristi, bá m'ndàngi mbete kin m'adi-si səi kí Lubə mbəti-si kí ayi isi bembə-je-ti dɔnangi Pɔ-ti, kɔ dɔnangi Galati-ti, kɔ dɔnangi Kapadosi-ti, kɔ dɔnangi Aji-ti, kɔ dɔnangi Bitini-ti. <sup>2</sup> Mbəti kí Bəbi-ji Lubə mbəti-si kinlé, to kɔjra liə kí oji kete low nu bá adi Ndil kí aa njay ində-si tagay kadi 'təli-né rɔ-si go ta-ti lə Jeju Kristi rəm, kadi məsi-é bɔr-né majal-je lə-si kɔgi rəm. Kadi ramaji kɔ lapiya lə Lubə nəy sə-si dɔ madi-é-ti ki dɔ madi-é-ti.

### *Kaji to nékində mɛɛ dɔ-ti kí maji nɔ*

<sup>3</sup> Kɔsgaji to 'lə Lubə kí to Bəbi 'Bəbe lə-ji Jeju Kristi. To kí Lubə to njəkoo kəmtondoo kí nɔ lé bá oji-ji-né koji kí sigi kɔ takul tɔsi kí Jeju Kristi tɔsi ndəl ində lo tɛɛ dan dow-je-ti kí d'oy, adi j'owi kɔ nékində mɛɛ dɔ-ti lə-ji kí tò sartagangi rəm, <sup>4</sup> nékugə doji kí à ndum al rəm, à tò nɛ al

rəm, bá ndole-é à tò lo tò-é-ti rəm ya tò dora-ti nɔɔ tò ngəbi-ji, <sup>5</sup> jəi kí tógi læ Lubə ngəm-ji kɪ takul kadmɛɛ kɔɔ kaji kí tò pèrèrè kadi toji rɔ-é ndaa-ti rəsi mɛɛ ndo-je-ti kí dɔbəy-ti.

<sup>6</sup> Gin-é kin bá, lé isi ingəi kɔ-je kí gay-gay kaglo-je-ti kí sɛ kí ngɔsnè kin kàrè, sɛi 'rai-né rɔnəl; kɔ-je lé tò kadi à ree dɔ-si-ti kɔɔ nɔ-si koo ya.

<sup>7</sup> Kɔɔtalə lɔr kí à tuji bəy kin kàrè d'ulə pərəə bá d'ɔr njar-é; beba kadmɛɛ læ-si kí to né kí maji nɔ itə lɔr kinlé kàrè d'a nɔ-é dan kɔ-je-ti koo, kɔɔ kadi go-ti rəmə ingəi tóy, kɪ kɔsgaji, kɪ rɪba ndo-ti kí Jezu Kristi à toji-né rɔ-é ndaa-ti rəsi takəm dow-je-ti.

<sup>8</sup> Kristi lé, sɛi ooi-é al ya 'ndigi-é rəm, sɛi ooi-é al bəy ya adi-é mɛɛ-si rəm ə 'rai rɔnəl kí to rɔnəl kí dum pa rəm, to rɔnəl kí rɪba-é nɔ rəm, <sup>9</sup> kɔɔ kaji kí aji kinlé to nékugə doji kadmɛɛ læ-si.

*Ta kí sobi dɔ njépata-je kí ta Lubə-ti, kɪ kaji*

<sup>10</sup> Njépata-je kí ta Lubə-ti kí 'pa ta kí sobi dɔ ramaji læ Lubə kí tò kɔɔ ta læ-si kinlé, 'ndər gin ta kí sobi dɔ kaji kinlé nɔ rəm, bá 'dəji ta kí dɔ-ti kete kɪ gogɪ rəm tɔ. <sup>11</sup> Kɔ-je kí Kristi\* à kingə, kɪ rɪba kí à kingə go-ti bá Ndil-é kí isi mɛɛ-dé-ti toji-dé kete kinlé, də 'ndər gin-é nɔ kɔɔ koo se à to dɔkaglo kí rá-ti, ə à ra né kɪ kəm rəbi kí ban wa?

<sup>12</sup> Lubə toji-dé adi 'gə kí né-je kí də 'pa ta-é kinlé, sobi dɔ-dé də al, ngà sobi dɔ-si sɛi. Beba bone bè njékilə mbɛ Poyta kí Maji 'pa d'adi-si kɪ tógi læ Ndil kí aa njay kí Lubə adi-é i dora-ti ree

\* **1:11** 1:11 Kristi lé kɔr mɛɛ-é to dow kí Lubə mbəti-é.

rɔ-dé-ti lé ə malayka-je kàrè 'ndigi kadi 'gə mɛɛ Poyta kí Maji kinlé tɔ.

*Panjiyə ngan lə Lubə*

*1Te 5:8-9; Tit 2:11-14*

<sup>13</sup> Gin-é kin bá, isi kəm dɔ rɔ-si-ti, indəi kəmkaa dɔ rɔ-si-ti ə adi mɛɛ-si bikti lay ya tò ki dɔ maji-ti kí à toki ra sə-si ndɔ-ti kí Jeju Kristi à toji-né rɔ-é ndaa-ti rəsi takəm dow-je-ti. <sup>14</sup> Səi lé, 'toi ngan-je kí njétəl rɔ-si go ta-ti, ɛn é bo né-je kí ndɔki ra-si loki isi-né dɔ mbə-ti bəy kinlé, adi ra-si gogɛ al ngá; <sup>15</sup> ngà adi panjiyə-si lay ya aa njay titi kí Lubə kí njəba-si aa-né njay kin bè tɔ. <sup>16</sup> Kdɔtalə 'ndàngi 'panè: Aai njay, kdɔ mə lé m'aa njay. <sup>17</sup> Lubə kí isi 'pai siə ta ə 'bai-é Bɔbi-si lé, ɛ to njəkɔr kəm dow al, adi ɛ gangta dɔ nɔ-nɔ-ti kɛ go kullə ra-é; ɛn é bal kisi kɛ dɔ taá lə-si dɔnangi-ti nè lé, adi panjiyə-si ilə kuji dɔ-é-ti.

<sup>18</sup> Səi 'gəi maji kí to là-je, kɛ lɔr-je kí à tuji kin bá Lubə gangi-né dɔ-si lo né ra-ti kí dɔ mbə-ti kí bɔbi-si-je d'oji-si-né kin al;

<sup>19</sup> ngà to məsi Kristi kí gati-é al dɔ lo, kí toki məsi ngonbatɛ kí məti goto rɔ-é-ti rəm, né kí maji al goto rɔ-é-ti rəm kin bá Lubə taa-si-né ilə-si taá.

<sup>20</sup> Kristi lé, Lubə mbəti-é kete nɔ kində gin dɔnangi-ti nɔ, ya ngà ɛ adi-é toji rɔ-é mɛɛ ndɔ-je-ti kí dɔbəy-ti kdɔ maji lə-si.

<sup>21</sup> Kɛ takul-é bá səi adi-né mɛɛ-si Lubə kí adi-é tɔsi ndəl ində lo tɛɛ dan dow-je-ti kí d'oy rəm,

ulə rifa dɔ-é-ti rəm;  
 bè kɔɔ kadi adi-né mɛɛ-si Lubə rəm,  
 indəi-né mɛɛ-si dɔ-é-ti rəm.

<sup>22</sup> Səi 'təli rɔ-si go ta-ti kí tɔgrɔ-ti adi 'toi dow-je kí aai njay, kɔɔ kadi 'ndigi-nə ndigi kí tɔgrɔ-ti titi kí 'toi-né ngankɔ-nə-je, é n é 'ndigi-nə ndigi kí kɔrkəm-nə, kə kədkəm goto-ti. <sup>23</sup> Səi lé, to ta lə Lubə kí tɔ kəm rəm, tɔ lo tɔ-é-ti sartagangi rəm kin bá oji-si koji kí sigi; ɓi to koji lə bɔbɔ-si-je kí d'a koy ndɔ madi kin al; <sup>24</sup> kdɔtalə 'ndangi mɛɛ mbete-ti kí aa njay 'panè:

Dow-je lay ya 'toki wale bè;  
 ə rifa lə-dé toki puti wale bè;  
 wale lé tuti ə puti-é ur,

<sup>25</sup> ngà ta lə 'Babe tɔ lo tɔ-é-ti sartagangi.

Ə ta kinlé, ɛ bá to Poyta kí Maji kí d'ilə mbe-é d'adi-si lé.

## 2

<sup>1</sup> Beba né lay kí to kullə mɛɛndul, kə né lay kí to kullə kədi dow-je, kə kədkəm dow-je, kə jangi-je, kə né lay kí to kulə ta ndil-nə-ti-je kinlé, 'tusi inəi kɔgi. <sup>2</sup> Adi ɓo ta lə Lubə kí to mba kí aa yéréré kin bá ra-si titi kí ɓo mba ra-né ngan-je kí bər kin bè, kɔɔ kadi 'tɔgi-né ə 'tɛɛi-né kaji-ti, <sup>3</sup> kdɔtalə səi 'nəi ooi adi 'gəi kí 'Babe maji. <sup>4</sup> Reei rɔ 'Babe-ti kí toki ər kí tɔ kəm, kí dow-je 'mbati, ngà Lubə mbəti adi to né kí gati-é nə ta kəm-é-ti†. <sup>5</sup> Səi ya kàrè 'toi ki ər-je kí tɔ kəm bè, é indəi rɔ-si nati kadi 'təli kəy kisi Ndil kí aa njay rəm, kadi 'toi njəgugnə-je kí aai njay, kɔɔ kadi

† 2:4 2:4 Epe 2:20-22; Mat 21:42-44; Ròm 9:24-33

Ndil kí aa njay ra adi adi kadjare kí nəl Lubə kì takul Jeju Kristi. <sup>6</sup> Kdɔtalə 'ndàngi mee mbete-ti kí aa njay 'panè: Ooi, mə Lubə m'mbəti ər kí gati-é ɲa, bá m'ində sul kəy-ti mee bebo Siyɔ-ti\*. Dow kí adi-é mee-é ə rɔ-é à sol-é al. <sup>7</sup> Adi səi njékadmee-je lé, səi bá rifa tò dɔ-si-ti. Ngà rɔ njémeengə-je-ti rəmə, ər kí njékində kəy-je d'ilə piringi kogi lé, bá təl to ər kí maji kí sul kəy-ti† rəm, to ər kí tugə dow-je jigi-ti rəm, to ər kí à ra dow-je kadi 'tusi‡ rəm. <sup>8</sup> De, 'tugə nja-dé ər-ti lé 'teɛ d'usi, kdɔ 'mbati təl rɔ-dé go ta-ti lə Lubə; gin-é kin bá kusi kinlé tò ngəbi-dé-né. <sup>9</sup> †Ngà səi njékadmee-je rəmə, səi 'toi gin dow-je kí Lubə mbəti-si rəm, 'toi njégugnə-je lə Lubə kí to ngar rəm, 'toi gin dow-je kí aai njay rəm, 'toi gin dow-je kí Lubə gangi dɔ-si, kdɔ kadi iləi mbə néra-je kí maji-maji liə ɛ kí njəba-si kadi ɲi londul-ti 'reei londogi-ti liə kí maji ɲa. <sup>10</sup> Səi lé ndɔki 'toi gin dow-je madi al, ngà bone bè 'toi gin dow-je liə; ndɔki Lubə oo kəmtondoo lə-si al, ngà bone bè Lubə oo kəmtondoo lə-si.

*Panjiyə njékadmee-je ki rɔ njékadmee al-je-ti rəm, ki rɔ njékɔbe-je-ti*

*Rɔm 13:1-8; Epɛ 6:5-8*

<sup>11</sup> Səi kí m'ində-si dan kəm-m-ti lé, 'toi mba-je, njékɔw kì nja-si taá bá m'ulə-né dingəm mee-si-ti kadi 'mbati bo né-je kí maji al kí tò daji rɔ-si-ti isi rɔ kì ndil-si. <sup>12</sup> Adi panjiyə-si maji dan njékadmee al-je-ti, kdɔ kadi lé d'isi d'ilə ta dɔ-si-ti 'panè 'toi dow-je kí njəra né kí maji al ya kàrè,

\* **2:6** 2:6 Eja 28:16 † **2:7** 2:7 Pa 118:22 ‡ **2:7** 2:7 Eja 8:14

† **2:9** 2:9 Tit 2:14

d'oo kullə ra-si-je kí maji-maji kin rəmə, d'osi-né gaji Lubə ndo kí à tɛɛ-né do-dé-ti. <sup>13</sup> Kdo ta lə 'Babe lé, uləi do-si gin tógi-ti lə ngar kdo to kí ɛ to 'boy do né-je-ti lay, <sup>14</sup> rəm uləi do-si gin tógi-ti lə gubərnər-je, kdo to kí dɛ 'to dow-je kí ngar ulə-dé kadi 'gangi ta do dow-je-ti kí njéra né-je kí maji al ə 'piti dow-je kí njéra né-je kí maji. <sup>15</sup> Kdotalə Lubə ndigi kadi 'rai maji kdo kadi uwəi-né ta mbə-je kí njégə né al. <sup>16</sup> Adi panjiyə-si to panjiyə dow-je kí Lubə taa-dé ilə-dé taá; kɛ bá adi taa kilə taá lə-si təl to né kɔn do mɛɛndul al; ngà kadi panjiyə-si to panjiyə ngannjékullə-je lə Lubə. <sup>17</sup> Uni ta dow-je lay; 'ndigi ngankɔ-si-je kí 'to njékadmɛɛ-je, 'bəli Lubə, uni ta ngar.

*Ta kí sɔbi do njékadmɛɛ-je kí 'to bə-je*

<sup>18</sup> Səi ngannjékullə-je, uləi do-si gin tógi-ti lə 'ba-si-je kɪ bəl kí tɔgrɔ-ti; dɛ kí 'maji rəm, 'səl ləm-ləm par bá kadi uləi do-si gin tógi-ti lə-dé al; ngà dɛ kí 'ngə kàrè, uləi do-si gin tógi-ti lə-dé tɔ. <sup>19</sup> Kdotalə kɔ́ kí dow ingə kɪ ndangi kare ya ə ore mɛɛ-é kdo to kí ɛ to njèbəl Lubə lé to né kí maji.

<sup>20</sup> Kdotalə kinə dow ingə kɔ́ kdo né kí maji al kí ɛ ra bá ore mɛɛ-é kàrè, piti ri bá d'a piti-é wa? Ngà kinə dow ingə kɔ́ kdo né kí maji kí ɛ ra bá ore mɛɛ-é rəmə, to né kí maji takəm Lubə-ti.

<sup>21</sup> To né kin bá Lubə ba-si kdo; kdotalə Kristi lé, ɛ ya kàrè ingə kɔ́ kdo ta lə-si tɔ; ɛ ra bè kdo kadi təl néndaji kadi uni-né do nja-é tɔ.

<sup>22</sup> Kristi lé ra majal nja káre al rəm, ədi dow nja káre al rəm;

<sup>23</sup> bá 'taji-é kàrè, ɛ taji-dé tó-ti al rəm,

d'adi-é kò kàrè, ɛ ay ro do-dé-ti al rəm,  
ngà ɛ in̄ə ro-é ji Lubə-ti kí to njègangta kí  
njururu.

<sup>24</sup> Kristi lé, ɛ ya ɔy majal-je lə-ji do-é-ti ɔy-né do  
kagdəsi-ti,

kdo kadi j'oyi koy majal-je lə-ji lé  
ə j'isi k̄i do-ji taá kdo néra kí njururu;  
ɛ bá ndunə dò-je liə aji-si.

<sup>25</sup> Kdotalə, ndoki ɔwi toki bati-je kí 'ndəm bè,  
ngà bone bè səi 'təli 'reei ro njèkul-si-ti kí to  
njèngəm-si.

### 3

#### *Ta kí sɔbi do njétaa-nə-je*

*1Ti 2:9-15; Epe 5:22-33*

<sup>1-2</sup> †Səi dené-je kàrè, uləi do-si gin tógi-ti lə  
ngɔbi-si-je, kdo kadi lé də kí dan-ti-je 'mbati təl  
ro-dé go ta-ti lə Lubə kàrè, kadi 'təl njèkadmeɛ-  
je k̄i takul panjiyə-si səi ne-dé-je, kdo koo kí d'oo  
kí panjiyə-si maji rəm, kdo kuji kí iləi do-dé-ti  
rəm ɓi k̄i takul ta kí ta dow-ti al. <sup>3</sup> †'Mɔnəi k̄i  
né-je kí ro-si-ti ndaa-ti nè kí to do kí kuwə-je,  
k̄i 'ningə lɔr-je, k̄i kubi-je kí là-é n̄a-n̄a kin al,  
<sup>4</sup> ngà 'mɔnəi k̄i né-je kí ɓoyɔ ro-é meɛ-si-ti, kí  
to né-je kí à tuji al, kí to panjiyə kí səl ləm-ləm  
rəm, kisi selele rəm; né-je kinlé bá, to né-je kí  
gati-é n̄a takəm Lubə-ti. <sup>5</sup> Gangi-é kin bá dené-je  
kí ndoki 'to dené-je kí d'aa njay, kí 'to njèkində  
meɛ-dé do Lubə-ti 'mɔne-né ə d'ulə-né do-dé gin  
tógi-ti lə ngɔbi-dé-je; <sup>6</sup> titi Sara kí təl ro-é go ta-ti

† **3:1-2** 3:1-2 Epe 5:22; Kol 3:18 † **3:3** 3:3 1Ti 2:9



lə Abrakam adi ɓa-é: 'Ba-m kin bè. Kinə adi ɓəl gangi mɛɛ-si al, adi 'rai maji kɪ mɛɛ-si kɪ nda kay rəmə, 'toi nganka Sara tɔ.

<sup>7</sup> †Sɛi dingəm-je kàrè, isi kɪ ne-si-je ə 'gəi kɪ dɛ 'to dow-je kɪ tɔgi-dé asi al nɔ. Uni ta-dé kdɔ dɛ kàrè d'ingə kaji kɪ takul ramaji lə Lubə nati sə-si tɔ; 'rai bè kdɔ kadi né madi ilə-si kagi lo pa ta-ti kɪ Lubə al.

*Ta-je kɪ sɔbi dɔ ndigna*

*Rɔm 12:14-21; Mat 10:24-31*

<sup>8</sup> Kɪ kadi m'tol-né ta ta kin rəmə, sɛi lay ya kadi ɔwi kɪ tagir kɪ kàre-rè rəm, adi mɛɛ-si asi-nɔ rəm. 'Ndigi-nɔ titi kɪ tuwə kadi ngankɔ-nɔ-je 'ndigi-né-nɔ, adi ta ɔ mɛɛ-si kdɔ ta lə-nɔ ə 'soli dɔ-si nɔ-nɔ-ti. <sup>9</sup> Dow ra sə-si né kɪ maji al kàrè, 'rai siə né kɪ maji al tó-ti al rəm, ɓá lé dow taji-si kàrè 'taji-é dɔ-si-ti al rəm; ngà 'tɔri ndi-si dɔ-é-ti; kdɔtalə né kin ɓá to né kɪ Lubə ɓa-si kadi 'rai kdɔ kadi ingəi-né tɔrndi tɔ.

<sup>10</sup> Dow kɪ ndigi kadi n'isi kɪ dɔ-n'è taá

ə n'isi dan maji-ti kɪ low-low rəmə,

kadi dowbé ngəm ndɔ-é lo pa ta-ti kɪ maji al

ə ngəm ta-é dɔ kədi ta-ti,

<sup>11</sup> kadi ɔr rɔ-é kɔgi mɛɛ néra-ti kɪ maji al ə ra maji,

kadi sangi lapiya ə sangi kəm-é kɪ kete-kete.

<sup>12</sup> Kdɔtalə 'Babe ində kəm-é go dow-je-ti kɪ njéra né kɪ njururu

ə yəl mbi-é oo-né ta-je kɪ 'pa siə;

ngà 'Babe ɔsi ta njéra né-je kɪ maji al.

† 3:7 3:7 Epe 5:25; Kol 3:19

*Kisi do nja-ti kɔ pa ta kɔ do nékində mee do-ti*

<sup>13</sup> Kinə indəi rɔ-si ta ra né-ti kɔ maji lé, n̄a à ra-si maji al wa? <sup>14</sup> † ɔ kinə ingəi kɔ kɔɔtalə néra kɔ njururu rəmə, səi 'toi njénékumə-je! Njéra né-je kɔ maji al lé, 'bɔli-dé al rəm, adi mee-si gangi man al rəm. <sup>15</sup> Ngà Kristi kɔ to 'Babe lé, kadi 'gəi mee-si-ti kɔ ɛ aa njay ə isi pèrèrè kɔ ndɔ-je lay, kɔ kadi kinə dow ndur gin kində mee do-ti lə-si rəmə idəi-é; ngà kidə bá idəi-é kɔ ta kɔ sol lom-lom rəm, kɔ kuji kɔ kilə rəm. <sup>16</sup> Adi tagir kɔ maji tɔ mee-si-ti, kɔ kadi lé d'ilə ta do-si-ti kàrè, de njépata kɔ maji al do panjiyə-si-ti kɔ maji kɔ to panjiyə Kristi lé, rɔ-dé sol-dé. <sup>17</sup> Kɔɔtalə kingə kɔ kɔ néra kɔ maji lé, kinə to ndigi lə Lubə rəmə, to soti itə kingə kɔ kɔ né ra kɔ maji al.

*Ta kɔ sɔbi do koy kɔ tɔsi ndəl lə Kristi*

<sup>18</sup> Kɔɔtalə Kristi kɔ do-é oy nja kàre-rè kɔ majal-je;

ɛ kɔ to njéra né kɔ njururu ya oy kɔ njéra né-je kɔ njururu al,

kɔ kadi ree sə-si rɔ Lubə-ti.

'Tɔl-é kɔ to kɔ to dow, ngà Ndil kɔ aa njay adi-é tɔsi ndəl tɛɛ.

<sup>19</sup> Kɔ takul Ndil kinlé bá ndɔki, ɛ ɔw ilə-né mbe Poyta kɔ Maji

adi ndil dow-je kɔ d'a dangay-ti koo tɔ.

<sup>20</sup> De bá ndɔki 'ra dɔngə, ya ngà Lubə ilə mee-é do madi-é-ti kɔ kete-kete mee ndɔ-je-ti kɔ Nuwe isi ra-né bato lé. Bato kinlé dow-je kɔ d'isi mee-é-ti d'aji rɔ-dé ta man-ti lé, de jinày joo-rè ya par bi 'n̄a al. <sup>21</sup> Né-je kin bá tɔji batəm kɔ aji-si ngɔsnè

† 3:14 3:14 Mat 5:10

ə to batem kí à kor né kí maji al rɔ dow-ti al, ngà to kun rɔ kadi Lubə kì tagir kí maji kì takul tosi ndəl kində lo tee lə Jeju Kristi. <sup>22</sup> Jeju Kristi lé, ɔw dɔrɔ-ti, isi dɔ jikɔl Lubə-ti; adi ɛ b́a malayka-je, kì njékɔbe-je, kì njétógi-je d'ulə dɔ-dé gin tógi-ti liə.

## 4

### *Ta kí sɔbi dɔ tusi panjiyə kí kete kinə*

<sup>1</sup> Beba titi kí Kristi ingə-né kò daji rɔ-é-ti lé, səi kàrè adi tagir kí bè kin tò mee-si-ti maji to; kdɔtalə dow kí ingə kò daji rɔ-é-ti lé, to dow kí ɔr rɔ-é kɔgi mee majal-ti, <sup>2</sup> kɔɔ kadi ndəgi ndɔ-je kí ɛ à kisi-né kì dɔ-é taá lé, isi kɔɔ ra né-je kí maji al kí bo-é ra dow-je kin al, ngà isi kɔɔ ra né kí Lubə ndigi. <sup>3</sup> Kdɔtalə ndɔki lé isi ká ra né-je-ti kí nəl njékadmee al-je, adi to kisi ká ra kaya-ti, kì kəmnda, kì gɔyibi kí kay, kì gɔnəkuso, kì kində-nə dirə nékay, kì pole magi-je kí to né rɔsɔl. <sup>4</sup> Ngà bone bè səi ayi sə-dé ngɔdi go kaya-ti kí al dɔ maji kin al ngá rəmə, d'oo ki né kí mba bè rɔ-dé-ti, adi 'pa ta-je kí maji al maji al dɔ-si-ti. <sup>5</sup> Né-je kinlé, d'a kor go-é nò Kristi-ti kí a pèrèrè kɔɔ gangta dɔ dow-je-ti kí d'oy rəm, dɔ dow-je-ti kí d'isi kəm rəm. <sup>6</sup> Gin-é kin b́a dow-je kí d'oy kàrè d'ilə mbɛ Poyta kí Maji mbi-dé-ti kɔɔ kadi lé 'gangi ta dɔ-dé-ti titi kí 'gangi-né ta dɔ dow-je-ti lay bè kàrè, Ndil kí aa njay adi d'isi kəm kì Lubə.

*Né-je kí gay-gay kí njékadmee à ra*

<sup>7</sup> Né-je lay ya ta tɔl ta-é nà̀y ngɔsi, ɛ́n ɛ́ indɛi kɛmkaa dɔ rɔ-si-ti ɔ isi kɛm dɔ rɔ-si-ti kɔɔ kadi 'pai ta kɪ Lubə. <sup>8</sup> Kete nɔ̀ né-je-ti lay lé, 'ndigi-nà ndigi kí tɔgrɔ-ti, kɔɔtalə ndignà lé uti dɔ majal-je nà\*. <sup>9</sup> Uwəi-nà ki rɔ nà-ti, ɔ 'yuni-né ta go-ti al. <sup>10</sup> Nà-nà ya Lubə adi-é kadkare kí sobi dɔ-é ɛ́ 'rai-né kullə adi-nà, beba à toi dow-je kí njèkində kɛm-dé maji go ramaji-ti lə Lubə kí tò gay-gay kin. <sup>11</sup> Kinə dow à pa ta rəmə, kadi to ta-je kí ta Lubə-ti ya bane; ɔ kinə dow isi oo go dow-je rəmə, kadi oo go-dé kɪ tɔgi kí Lubə adi-é tɔ. Bè kɔɔ kadi né-je lay ya Lubə ingə kɔsgaji mɛɛ-é-ti kɪ takul Jeju Kristi. Lubə lé, rifa kɪ tɔgi to 'liə kɪ dɔ bal-bal. Amɛn!

*Njénékumə bá ingə kɔ̀ kɔɔ Kristi*

<sup>12</sup> Səi kí m'ində-si dan kɛm-m-ti, kɔpər kí isi dan-ti kinlé to nənà mɛɛ-si koo ɛ́n ɛ́ adi ra-si bəl al, nè à kɪ kooi kí to né kí mba bá tɛɛ dɔ-si-ti. <sup>13</sup> Kɔ̀-je kí ndɔki Kristi ingə lé, səi isi ingəi tɔ ɛ́n ɛ́ 'rai rɔnəl; kɔɔ kadi ndɔ kí ɛ́ à tɔji rifa liə ndaa-ti rəsi lé, səi a rai rɔnəl ɔ a tiləi kole. <sup>14</sup> Kinə dow-je 'taji-si kɔɔ Kristi lé, 'toi njénékumə-je, kɔɔtalə ndil kí njèrifa kí to ndil Lubə isi mɛɛ-si-ti. <sup>15</sup> Kadi dow madi dan-si-ti ingə kɔ̀ kɔɔ to kí to njètɔl dow-je al rəm, kɔɔ to kí to njèbogɪ al rəm, kɔɔ to kí to njèra né kí maji al al rəm, bá kɔɔ to kí to njèkində rɔ-é ta-ti lə dow-je al rəm. <sup>16</sup> Ngà kinə dow ingə kɔ̀ kɔɔ to kí ɛ́ to njèkun go Kristi rəmə, kadi rɔ-é sɔl-é al; ngà kadi dowbé ɔsi

\* **4:8** 4:8 Kuti dɔ majal-je kí ta-é tò nè kinlé to ta kí sobi dɔ kuti majal-je kadi oo al al, ngà sobi kinə go majal-je kɔgi (Gos 10:12; Pa 32:1)

gaji Lubə kɔ ri njəkun go Kristi kí tò dɔ-é-ti kin. <sup>17</sup> Kɔ kaglo asi kadi ta kí gangi à kulə gin-é meɛ kəy-ti lə Lubə. Ngà kinə jəi bá ta kí gangi ulə gin-é dɔ-ji-ti lé, dow-je kí njémbati kadi meɛ-dé Poyta kí Maji lə Lubə kin ta tɔl ta-dé à tò ban ngá ɛn wa? <sup>18</sup> Ə kinə njèra né kí njururu ya lo kaji liə ngə n̄a bè lé, njèkilə kuji dɔ Lubə-ti al kí to njèra majal əjè 'liə à tò ban ngá wa? <sup>19</sup> Beba dow-je kí d'ingə kɔ kɔ meɛ ndigi lə Lubə lé, kadi d'inə rɔ-dé ji njèkə dɔ ndi-é-ti kí to njèkində né-je lay ə kadi 'ra maji.

## 5

### *Takoji kí sobi dɔ 'ngatɔgi-je, kɔ njèkadmeɛ-je 1Ti 3:1-7*

<sup>1</sup> Beba 'ngatɔgi-je kí d'isi dan-si-ti lé, ma kí m'to 'ngatɔgi madi-dé m'ulə dingəm meɛ-dé-ti. Ma lé, kɔ-je kí Kristi ingə kàrè m'a lo-é-ti m'oo kɔ kəm-m rəm, bá rifa liə kí Lubə à toji ndaa-ti rəsi lé kàrè m'a kə lo-é-ti rəm tɔ. <sup>2</sup> †M'ulə dingəm meɛ-dé-ti m'panè: Uli bati-je lə Lubə kí ində-si ta-dé-ti; uli-dé kɔ meɛ ndigi lə-si kɔ gangi-é kí nəl Lubə ya bi titi né kí dow uwə-si kí lə njètɔgi-ti bè al rəm, 'rai kí kullə là al rəm, ngà uli-dé kɔ meɛnda kay. <sup>3</sup> Bati-je kí Lubə ində-si ta-dé-ti kinlé, 'rai ngar dɔ-dé-ti al, ngà 'təli néndaji kadi 'ndaji. <sup>4</sup> Beba loki njèkul bati-je kí boy à ree lé, səi a kingəi jɔgi rifa kí ndole-é à goto al.

---

† 5:2 5:2 Jə 21:15-17

<sup>5</sup> Bè ya to, sɔi basa-je kàrè uləi dɔ-si gin tógi-ti læ 'ngatógi-je to. Sɔi lay ya 'soli dɔ-si lɔm-lɔm nɔ-ɲa-ti. Kdɔ Lubə ɔsi ta njékində kàdi-dé-je, ngà ɛ ramaji kí njésol dɔ-dé-je.\*

<sup>6</sup> †Ən é 'soli dɔ-si nɔ Lubə-ti kí tógi-é asi gaki kin, kdɔ kadi kaglo kí mɛɛ-é ndigi ə itə dɔ-si ki taá. <sup>7</sup> Né-je lay kí mɛɛ-si ɔ kəkəkə kdɔ lé, inɔi mɛɛ ji-é-ti, kdɔtalə ɛ to njékoo go-si.†

### *Kɔ-je kɔ riba læ njékadmɛɛ-je*

<sup>8</sup> Indəi kəmkaa dɔ rɔ-si-ti. Isi kəm dɔ rɔ-si-ti. Njəba læ-si kí to Sú isi ijə rɔ toki bɔl bè, ilə gəə dɔ-si, isi sangi dow kí n'a tuji-é. <sup>9</sup> 'Ndangi-é ə ɔi gərərə dɔ kadmɛɛ-ti læ-si, ə kadi 'gəi kí kɔ-je kí isi ingəi kinlé, ngankɔ-si-je kí njékadmɛɛ d'isi d'ingə kəl lo-je-ti kí rangi dɔnangi-ti nè bè ya to. <sup>10</sup> Go kɔ-je-ti kí tɔ kadi à kingəi kaglo sɛ bəy kinlé, Lubə kí to njèramaji mɛɛ né-je-ti lay kí ba-si kɔ takul Kristi, kdɔ kadi ingəi riba liə kí à to sartangani lé, à təl kində-si d'irə-ti kí mbaa sɔ rəm, à mbusi nja-si rəm, à kadi-si tógi rəm, bá à ra sə-si kadi ɔi lo kɔ-si-ti gərərə rəm to. <sup>11</sup> Ɛ ya tógi to 'liə kɔ dɔ bal-bal! Amən!

### *Sɔy ta-je kɔ lapiya kí ra*

#### *1Te 5:23-28*

<sup>12</sup> †Kɔ takul ngonkɔ-m Silbɛ‡ kí to njəkə dɔ ndi-é-ti, bá m'ndangi-né ta-je kí sɛ kin m'adi-si,

\* **5:5** 5:5 Gos 3:34; Jak 4:6 † **5:6** 5:6 Mat 23:12; Luk 14:11; 18:14 † **5:7** 5:7 Pa 55:23 † **5:12** 5:12 Knj 15:22,40 ‡ **5:12** 5:12 Silbɛ lé ya to Silasi. Knj 15:22; 2Kɔ 1:19

kdo kulə-né dingəm mēē-si-ti rəm, kdo kidə-si-né rəsi kí ramaji lə Lubə kí ǵi dɔ-ti kinlé ę ya to ramaji kí tɔgrɔ-ti.

<sup>13</sup> †Njékəwnə-je kí Lubə mbəti-dé kí d'isi febo Babilɔn-ti 'ra-si lapiya rəm, b́a Marki kí m'oo-é ki ngon mēē-m bè kin kàrè ra-si lapiya tɔ. <sup>14</sup> 'Rai-nə lapiya kuwə-nə kàdì-nə-ti kdo ndigi kí 'ndigi-nə. Səi lay kí 'nami kàdì Kristi-ti lé, kadi lapiya này sə-si!

---

† **5:13** 5:13 Knj 12:12,25; 13:13; 15:37-39; Kol 4:10; Plm 1:24

**Ta lə Lubə Kunmindí kí Sigi**  
**Mango: Ta lə Lubə Kunmindí kí Sigi (New**  
**Testament)**

copyright © 2019 Wycliffe Bible Translators, Inc.

Language: (Mango)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

96bdbd07-24d6-556c-9e7c-7269c72880cd